

DOMINGU II TEMPU KOMÚN – TINAN C

Tema

Liturjia ohin nian aprezena ilas kazamentu nian nu'udar ilas ne'ebé esprime ho forma privilejiada relasaun domin ne'ebé Maromak (espozu) estabelese ho ninia Povu (espoza). Nune'e kestaun fundamentál mak revelasaun kona-ba Maromak nia domin.

Leitura dahuluk define Maromak nia domin nu'udar domin ne'ebé la naksobu no rohan-laek, hafoun nafatin relasaun no nakfilak nia espoza, maski nia iha sala oioin karik bá iha tempu uluk. Maromak nia ksolok mak domin ida-ne'e.



Evanjellu aprezena, iha kontestu kazamentu ida nian, “sinál” ida ne'ebé hatudu buat esensiál kona-ba Jezús nia “programa”: aprezena ba ema sira Aman ne'ebé hadomi sira, no ho nia domin bolu ema sira ba ksolok.

Leitura daruak ko'alia kona-ba “karizma” sira – don sira, ne'ebé husi sira hatudu Maromak nia domin, atu uza ba ema hotu nia di'ak; karizma sira la bele uza ezkluzivu ba ema balun de'it, maibé tenke tau ba ema hotu nia benefísiu ho simplisidade. Esesniál tebes atu iha comunidade sarani nia laran, maski iha diversidade membru no karizma nian, bele hatudu domin ne'ebé liga Aman, Oan no Espíritu Santu.

LEITURA I – Is 62,1-5

Testu ne'e pertense ba bloku Tritu-Isaías (kap. 56-66): koleksaun testu anónimu sira-nian hakerek iha Jerusalém durante sékulu VI no V mK.

Ita iha Jerusalém, iha época pós-ezílíka. Ema bele not aiha sikkun hotu sidade nian marka sira destruisaun nian. Makhorik uitoan sidade nian moris iha kondisaun pobreza boot; sira mehi no hein restaurasaun ba Templu no Jerusalém foun, nakonu ho “oan sira” no ho dame.

MENSAJEN

Sidade Jerusalém mak sidade espoza Jahwéh nian. Ilas la'en nia domin ba feen define domin boot Maromak nian ba nia Povu.

Loos duni katak Jerusalém, feen ne'e, husik tiha Jahwéh no halai tuir maromak seluk. Testu hatudu katak sei iha kazamentu foun entre Jerusalém no Maromak. Profeta nia preokupasaun mak hatudu oinsá Maromak sei halo nia espoza sai furak no foin-sa'e, tanba Maromak la para atu hadomi, no bolu nia nu'udar ida ne'ebé nia hadomi liu. Maromak nunka haluha ninia domin, maski nia espoza halo salan, nia kontinua hadomi nia... Domin ne'ebé nunka kotu ne;e mak sei hafoun fali relasaun, sei halo atu bele iha fali kazamentu foun no sei nakfilak

“espoza” infiel iha “kaibauk nabilan”, ne’ebé nabilan iha liurai nia liman. Iha ne’e mós subliña Maromak nia “ksolok” atu hafoun fali relasaun: Maromak aliansa nian hakarak, ho kbiit tomak husi nia domin, halo dalan hamutuk ho ninia Povu: Nia haksolok de’it bainhira ema aseita domin ne’ebé Maromak hakarak fahe no hakonu ema nia fuan ho dame, moris no ksolok.

LEITURA II – 1 Cor 12,4-11

Kapítulu sira 12-14 Paulo nia Surat dahuluk ba Koríntiu sira ko’alia kona-ba “karizma” sira. “Karizma” mak liafuan típika Paulo nian (mosu dala 14 iha Paulo nia Surat sira no dala ida de’it iha Testamentu foun nia hakerek seluk), ne’ebé ehakarak dehan grasa (“kharis”) ka don ne’ebé Maromak haraik, hodi la haree ba fatin ne’ebé ema ida okupa iha jerarkia ekleziál. Maski “karizma” sira-ne’e Espíritu Santu haraik ba comunidade nia di’ak, bele mós uza sala. Husi sorin ida, bele lori atu hasa’e indivíduu ida iha fatin aas; husi sorin seluk, tanba la’ós katak ema hotu soi karizma estraordinária, bele fasil liu atu konsidera sira-ne’e nu’udar sarani klase ki’ik nian. Problema kona-ba importánsia karizma ida-idak nian mós sai preokupasaun ba comunidade Korintu nian. Ita haree comunidade ida ho problema grave konfliktu nian ne’ebé fó valór boot liu ba “esperiénsia karizmátika” ba benefísiu rasik. Ida-ne’e mak kria individualizmu no divizauniha comunidade nia leet. Ba problema ida-ne’e mak Paulo buka atu hatán.

MENSAJEN

Iha testu ida-ne’e, Paulo halo lista tipu sira “karizma” sira-nian; maski nune’e, nia halo klaru katak, maski iha diversidade, sira hotu mai hsui Maromak ida de’it, Na’i ida de’it, Espíritu ida de’it.

Fiar-na’in ida-idak soi Espíritu, nune’e, nia ho modu oioin no sasukat lahanesan, simu “karizma” sira. Buat ne’ebé fundamentál mak “la bele uza “karizma” sira ne’e ho forma egoísta, maibé tau ba ema hotu nia di’ak.

Tanba ne’e, la loos atu diskute kona-ba “karizma” ida-ne’ebé mak importante liu. La loos mós atu hanoin katak sira ne’ebé soi karizma sira sente sira nia an “simu naroman” no foti an iha comunidade nia oin. Maromak ida de’it maski iha na’in tolu keta-ketak, ne’ebé halo ita hotu sai ida de’it; Komunitade tenke sai lalenok comunidade Maromak nian, comunidade trinitária.

EVANJELLU – Jo 2,1-11

Testu ne’e pertense ba “seksaun introdutória” Evanjellu dahaat nian (husi 1,19 to’o 3,36). Iha sesaun ne’e, autór apresenta personajen oioin ne’ebé tama no sai, hanesan iha palku teatru nian, ho intensaun atu apresenta Jezús no ninia programa.

Autór deklara ho modu esplísitu (kf. Jo 2,11) katak epizódium ne’e pertense ba kategoria “sinál” nian (“semeiôn”): asau simbólika, sinál indikadór sira, ne’ebé konvida ita atu buka, hodi hakat liu epizódium konkretu, realidade ne’ebé kle’an liu ne’ebé narraun hakarak hato’o. Buat importante iha ne’e, la’ós katak Jezús nakfilak bee ba tua; maibé apresentasaun kona-ba Jezús nia programa: lori ba relasaun entre Maromak no ema tua ksolok nian, domin nian no festa nian.

MENSAJEN

Epizódiu haktuir iha ne'e, mak asaun simbólika ida ne'ebé hatudu buat ruma importante liufali fenomenu konkretu ne'ebé nia haktuir. Sá loos realidade ida-ne'e? Senáriu baze mak kazamentu ida. Hanesan ita hare iha leitura dahuluk, kazamentu ne'e refere ba relasaun domin nian entre Jahwéh no Maromak nia Povu. Ho liafuan seluk, ita-nia kontestu mak kontestu "alianza" nian entre Israel no ninia Maromak.

Ba "alianza" ida-ne'e, mak iha altura ida, kuran tiha tua. "Tua", elementu indispensavel iha "festa kaben", mak símbolu domin entre espozu no espoza (kf. Cant 1,2;4,10;7,10;8,2. Ita bele hanoin fali oinsá Isaías kompara "alianza" ho ai-uvras ne'ebé Na'i kuda no la fó fuan - kf. Is 5,1-7). Nune'e ita haree katak, realidade "alianza" tuan nian sai tiha relasaun maran ida, lahó ksolok, lahó domin no festa, ne'ebé la fó atensaun ona ba enkontru domin nian entre Israel ho nia Maromak. Realidade kona-na "alianza" estéril no lahó fuan ne'e ninia representasaun mak "kusin neen fatuk nain ne'ebé uza atu judeu sira hamoos an". Númeru neen hatudu imperfeisaun, lkatak la kompletu; "fatuk" fó hanoin kona-ba fatuk Lei Sinai nian no fuan sira fatun nian ne'ebé profeta Ezequiel haktuir (kf. Ez 36,26); referénsia ba "hamoos an" ka purifikasaun fó hanoin kona-ba ritu no eziyénsia sira Lei tuan nian ne'ebé hatudu Maromak nia oin nu'udar ida ne'ebé dook, kastigu se halo salan, hirus: Maromak ida hanesan ne'e ema ta'uk maibé la hadomi... Kusin sira "mamuk" hela, basá instrumentu sira-ne'e hotu inutil no la efikás: la serve atu halo ema hakbesik Maromak, maibé hadook ema husi Maromak difisil no distante ida-ne'e.

Ita ba haree personajen sira ne'ebé aprezent aih ane'e. Uluknanai ita iha "inan": Nia "iha ne'ebá", hanesan nia pertense ba festa kaben; husi sorin seluk, nia mak haree katak situasaun la di'ak (tua la iha ona): nia representa Israel fiél, ne'ebé komprende realidade no hein atu Mesias nakfilak situasaun.

Hafoin ita iha, xefe meza nian, ne'ebé representa dirijente judeu sira nian, ne'ebé tuur hakmatek no ho kómodu, sira la haree ka la iha interese atu komprende katak "alianza" tuan sai naksobu ba daudaun.

"Servente ka atan sira" mak sira ne'ebé kolabora ho Mesias, sira e'ebé disponivel atu halo buat hotu "ne'ebé Nia dehan" (kf. Ex 19,8) atu habiit filafali "alianza".

Ikusnian, ita iha Jezús: ba nia mak Israel fiél ("feto"/inan) diriye ka hasae lia atu bele fó vida foun ba "alianza" ne'ebé mate daudaun; maibé Mesias fó sai katak presiza soe tiha "alianza" ne'ebé kuran tua domin nian (iha portugés: "que temos nós com isso?"). Jezús nia obra la'ós atu prezerva instituisaun antiga sira, maibé apresenta novidade radikál isa... Ida-ne'e sei akontese bainhita sei to'o "Oras" ("Oras" ba João, mak momentu mate iha krús, bainhira Jezús fakar ba humanidade nia leten lisaun domin total Maromak nian).

Epizódiu "Kazamentu Kaná" nian, fó sai Jezús nia programa: lori tua ksolok nian, domin no festa nian ba relasaun entre Maromak no ema sira. Programa ne'ebé nia hala'o iha ni amoris tomak, realiza ho modu kompletu iha "oras" saran-an total domin nian iha krús tutun.